


माक्सवाद व स्टेलिन



प्रकाशक:—

नया साहित्य भवन
मोतीभील, मुजफ्फरपुर (बिहार)

रवि शाक्य, इखाछें, यल

मार्क्स या अमरवाणी

संसार या ज्यामित, छर्प जु !

सर्वहारा याके हिम्मत मदेव, म्वात्ता चोनेत

“गुलामी या जंजीर” च्यः भ्वातिं ज्वीगु सिवा छुं म्फ;

तर त्याके फुसा ला सारा संसार अमिगु हे जुई ।

—कार्ल मार्क्स

माक्सवाद व स्टेलिन

चोखः—ज्ञानरत्न बज्राचार्य

(युग-प्रवर्तक)



प्रकाशकः—

नया साहित्य भवन

मोतीभील, मुजफ्फरपुर (बिहार)

सन १९५१ ई० ले

न्हापां छापे जूगु

१०००

मू० कं. खाना

१५



छगु खँ ?

लेखक या भनाई छु धाः सा । थ्व भौतिक जगते ला व हिं वने जुया चोंगु मानव रुपी शरीर यात रक्षा याना तेत अन्न वस्त्र व वास आदि बुनियादि चीज त मदेकं मगा ।

थ्व वस्तुत देकेया लागी न्हाम मनुष्य यान ज्याख याना धन सम्पत्ति कमाई याः जुई तर गन अमिगु सम्पत्ति

लें सुनान मिखा तथा लाका नयी अन अपि लिसे ल्वाय माली ।

संसारे गरीब तेगु गुलि दुःख दु, उकियात सुनां जक मस्यूगु दु । छ खे सोसा गन थ्व दुनियां धनी, विर्तावाल बनिया दपाला व पुरोहित आदि थमिसं बिना छुं वस्तुत देकेगु ज्याख मयासे नं संसार यागु दको सुख भोग याना चोंन अन गरीब तेगु लागी कित मखुसा मनूत नं गदात समानं हिया चअति ज्वीक ज्या याना नं नय मखंका च्यं भवार्ति जुया चुंचोने माल, मखुसा उलिनं मदेका बेकारी जुया लटं-फटं जुया नय मखं का धमा धम सिना वने माल ।

थ्व गरीब व धनी या बिचे दशा पागु, असमानता व भयंकर भेदभाव पिहाँ ओगु ली थपाय चो आपा भेद दुगु कारण छुख धासा सामन्त साम्राज्य व पूँजीवाद अवश्य ख । उकिं थुकियात गथेयाना हते याना संसारे दको मनूत उति खंका सकलें बराबर सुखी यानावी फै धैगु विषय ले साम्यवाद या आचार्य कार्ल मार्क्स कना थकूगु ख व स्टेलिन यागु ख सकसिनं थ्वी थव्यु धैगु अभि प्रायं थ्व चिकीचा धंगु “मार्क्सवाद व स्टेलिन” धैगु सफू छगु चोया बिया ।

—ज्ञानरत्न बज्राचार्य

माक्सवाद धैगु छु ख ?

थौं प्राकृति व मानव-समाज गथे च्वं, अथे थ्व सदां जुया चोनी मखु । सदां हे थ्व बदेजुया हानं हितुहिला वई चुंचोन । जइ पदार्थे नं स्वभावया गति दुने दइ चोंगु या कारणं याना जइ वस्तुत नं कठहनं बदेजुया हानं रुपहिला वइ चुंचोन । थुकिं प्रकृति यात बदेयाना हानं हितुहीका तइ तल । थ्व बदे जुया ओगु खास प्रकृतिया परिस्थितिं सृष्टी जूगु ख । सृष्टिया क्रिया यागु ताहाक गु सिलसिला या खास प्रकृतिया परिस्थिति ले मानव रूपी जानवर त बदेजुया बल । जइ पदार्थ या दुने नं चले जुया चोंगु चाल यागु स्वभावया परिणाम स्वरूप जीव दुगु वस्तुया विकास जुया बल; गुकिं विकास या सिल-सिलाए खास प्रकृतिया परिस्थिति स पशु यागु रुप धारण याना हल । बदेजुगु व हितु-हिला ओगु प्रकृतिया परिस्थिति नाप संघर्ष जुयानं हानं थपिनं बदेजुया—हानं हितुहिला वइ चुंचोन । खास हिलावंगु प्रकृतिया परिस्थिति ले खास किसिम यापिं जानवर त मनुष्य या रूपे बदेजुया हानं सामूहिक रुपं प्रकृति या विरुद्धे संघर्ष याएगु या संचालन जुया बल । थ्व बिकास या इतिहासे खास प्रकृति नाप जक संघर्ष जुयानं हानं मानव समाजया आन्तरिक संघर्ष (दों-कलह) नापं पिहाँ बल ।

माक्स प्राकृतिक सामाजिक बिकास व परिवर्तन यागु गति

विधी या सिलसिला यात बांलाक सीका हल हानं उकियागु कल स्वरूप बिश्व व मानव समाजया विषय ले वेकः नं विज्ञानया विचार धारात पिकया हल । मार्क्स यागु श्व विचार धारा (ज्ञान) यात सकसिनं मार्क्सवाद (मार्क्स या ज्ञान) धका दुनीया भरे दको शोषित व पीड़ित श्रामक जनतां मान्य याना नै तल ।

मार्क्सवाद या उदय

मार्क्स या न्हापा सुनानं हे पदार्थ या ज्ञान यात विज्ञानया ढंगं बिचायाना व ख समाज या न्हेवने तई मव्यु । मार्क्स या न्हापा आपा सिनं आर्थिक समता स (घनया उतिखंकेगु ली) आपा जोर याना चुंचोन, तर उकिया आधार छु जुई, वख सुनानं हे बांलाक कना मव्यु । मार्क्स हे जक दकसिवे न्हापा लाक श्व ख कना बिल कि “मनुष्य यात, गन मनुष्य द्रासं गुगु शोषण जुया चुंचोन, व वन्द याना बो मा” धका हानं शोषण या तरीका छु ख, व गथे याना वन्द जुया बनी, श्व ख सुनानं हे विज्ञान या ढङ्गं अन्वय याना दको वस्तु यात छुते ब्वीक कना मव्यु ।

मार्क्स या जव जन्म जुल, उगु वषते नं आपा बिद्वान त दु । अमिसं खालि समाजे छुं सुद्वार जकं याए तेन, तर आः यागु पुंजीवादी समाज या छु ढाँचा ख व ख बांलाक सकसिनं श्व ब्वीक कना मव्यु । अमिसं आः यागु समाजे भौतिक परिवर्तन याना बी मागु या विषय लेनं गबले सं हे छुं मती

तः गु मरु । अमिसं खालि मानव-समाजे छुं सुद्धार जकं याए तेन हानंश्व ज्वा खं यायेत गवले सं हे तैयार मजू कि मानव समाजे श्व मभिं गु चाल-चलन या धनया व राज्यनीतिया यन्त्र यात ध्वंस जुईक स्यंका हानं उकिया थासे न्हूगु राज्यनीतिया यन्त्र यागु निर्माण याना बी माल धैगुली । श्व विद्वान त मध्ये आपा सिनं हानं श्व खँ सीकेत कोशीस यात कि पूजोवाद गथे जुया पिहाँ बल हानं गथे जुया समाज यागु उत्पादन या साधने खास याना वर्ग विशेष या जक अधिकार जूवन । सुनानं हे थुकि यात हते याना बीगु तरीका बांलाक तज्ञाना कना मव्यु । खालि मार्क्स हे जक श्व ख यात विज्ञान या ढंगं विश्लेषण याना व श्व ज्याख सिद्ध जुईगु उपाय बांलाक कना थकल ।

मार्क्स या समये छह्य हानं मेह्य विज्ञानया विद्वान डार्विन जुल वेकः नं बिकासवाद या सिद्धान्त पत्ता लगे याना बिल । वं श्व खं कना बिल कि गथे जुया प्राणी या उत्पत्ति जुल । दक-सिवे न्हापा लाक वं हे जक श्व ख कंगु दु कि गुगु प्रकारं प्रकृतिया भौतिक परिस्थिति व जीव दुगु पदार्थे सक्रिय (ज्यांहे) परस्परया विरोध यागु संगमं याना जीव या उत्पत्ति बिकास व परिवर्तन जुल अर्थात् प्रकृतिया अबस्था व जीव दुगु पदार्थ या विवे ल्हाना च्वंगु एकतां याना प्राणी या उत्पत्ति व बिकास जुल । थुकिं याना समाजे छगु न्हुगुहे ख सिया बल हानं मार्क्स यात यको भर दत ।

मार्क्स प्रकृति व मानव-समाज या बिकास जुया ओगु चाल-चलन यात बांलाक पत्ता लगे यात हानं उकिया बिकास जुया

ओगु सिद्धान्त यात नं पत्ता लगे याना, वखं बांलाक बिचा याना लि सकसिनं सीकेत साहा समाज या न्हेवने तै बिल । मानव समाज या विकास जूगु सिल-सिला नं वेक नं पत्ता लगे यात कि पंजीवाद धैगु छु ख ? हानं पूजीवादी व्यवस्था व पूजीवादी समाज छुख ? छु बल्लागु हा यागु भरे थ्व मभिगु चाला (पूजीवादी समाज) टेके जुया चुंचोन ? मार्क्स या न्हापा थजागु खं यात सुनानं हे विज्ञानया ढङ्ग विश्लेषण याना सुईतं कना मव्यु । वेकः नं हे जक थ्व खं यागु वैज्ञानिक विश्लेषण याना कना बिल ।

मार्क्सवाद या आधार व स्वरूप

फ्राँस या समाजवाद इंगलैन्ड या पुलांगु अर्थशास्त्र व जर्मनी या दर्शन यात मिले याना मार्क्स छगु न्हुगु क्रान्तिकारी सिद्धान्त (प्वीकेगु मन्त्र) कना बिल । मार्क्सवादं प्रकृतियागु व समाजयागु चाल या वैज्ञानिक सिद्धान्त यात पत्ता लगे यानावी धुसेलिं आः छको भीसं उकि यात बिचा याना सोसा व खं तुरन्त पत्ता लगे जुइ कि मार्क्सवादं थौं कन्हे सकभनं क्रान्तिकारी समाजवादी (Social Revolution) आन्दोलन यागु रूप धारण याये धुकल । थ्व खं छगु प्रकारं पकिगु व जीवीतगु आन्दोलन या रूप धारण याना पूजीवादी समाज या भित्रे छिड़े जुया वई चुंचोन, गुगु क्रान्तिकारी श्रेणी संग्राम या इतिहास या स्वरूप जुयावे धुकल ; गुकि पूजीवाद-साम्राज्य वादी संसार स श्रमिक वर्ग या क्रान्तिकारी श्रेणी संघर्ष यागु

रूपं बालाक हे खने देक चले याना है चोने धुंकल । वास्तवे माक्सवाद छगु प्रकारं क्रान्तिकारी समाजवादी आन्दोलन यागु रूप ग्रहण याना हये धुंकल , गुकिया भित्रे लगे जुया चोंगु सिद्धान्त व कोशीसं याना इतिहास या स्वरूपः छगु लिं मेगुलि हितु-हिला नाना प्रकारं या स्वरूप बदले जुया बये धुंकल । थुकि यागु स्वरूप या वयान उकिया इतिहास या उदेश्य द्वारां हे सिया वै । उदेश्य यागु परिवर्तन या साथ-साथे हे हानं मुख्यगु इतिहास या रूपनं बदले जुया वनी । दक सिवे न्हापा लाक श्रमीक वर्ग यागु श्रेणी संग्राम या रूपे पिहा वै उथाय थुकिया इतिहास या ज्याख थजागु जुया वैकि राजसत्ता (हुकूमते) कब्जा याना कायगु । थ्व इतिहास या क्रान्तिकारी उदेश्य यात पूरा याना काय या लागीं थुकिं समाजवादी क्रान्ति या रूप धारण याना हई । गथे श्रमिक वर्ग आर्थिक व राजनैतिक प्रभुत्व थः गु ल्हाते लाका हई, अले हानं तुरन्त थुकिं समाजवादी क्रान्ति सर्वहारा वर्ग या मनपरी (तानाशाही) यां रूपे बदले जुया वनी । थ्व याकन समाप्त जुई मखु । उगु समय थुकिया उदेश्य जुई कि अमिसं थजागु भौतिक परिस्थिति यात बिकास याना हई की गुकिया भित्रे समाजवाद या अन्तिम विजय-समाजवाद-साम्यवाद यागु हा (Low stage of Communism) व साम्यवाद या मा (High stage of Communism) यागु स्थापना जुई धुंकू भेष बदले जुया वनी समाजवाद या अन्तिम विजय पावे ज्वी धुने व उकियागु इतिहास या ज्याखं व ज्वी कि गना वंगु राज्य

एकदम ध्वंस जुया मद वने यव्यु हानं सामाजिक व आर्थिक जीवन या संचालन “प्रत्येक व्यक्ति याके अमिगु शक्ति या अनुसारं समाजया ज्या कया हानं अमिगु सामाजिक जीवन यात मागु अनुसारं अमित वस्तु पावेज्जी” धैगु सिद्धान्त या आधारे ज्याखं जू बनी । सामाजिक वर्ग या समाप्त जुई धुनेव वर्ग संघर्ष नं सिधया वनी हानं प्रकृति या विरुद्धे संघर्ष यांयगु ली हे जक मानव व मानव समाज या जीवन संचालन जू वै ।

मार्क्सवाद-क्रान्तिकारी श्रेणी संग्राम या बिज्ञान

च्वे भीसं खने धुंकूगु दु कि मार्क्सवाद या इतिहास यागु ज्याखं हितु-हिला वंगु या साथ-साथे उकियागु रूप नं हितु-हिला वनी । थुकिया परिभाषा ज्के चोया तैगु प्यंगु भागे इना चोंगु दू ।

(१) श्रमिक वर्ग या श्रेणी संग्राम या बिकास ।
(२) आर्थिक राजनैतिक प्रभुत्व प्राप्ती या लागी हका-हक व चैतन्य लड़ाई । (३) श्रमिक वर्ग यागु अधिनायक तन्त्र व समाजवाद या स्थापना । (४) क्रान्तिकारी अधिनायक तन्त्र यागु इतिहास या परिणाम थुकियागु लोप ब्बीव उकिया थासे “वर्ग-हिन” साम्यवादी-समाज या स्थापना ।

उकिं मार्क्सवाद यात श्रमिक वर्ग यागु क्रान्तिकारी “वर्ग संघर्ष” या विज्ञान अर्थात मजदूर-किसान या मुक्ति विज्ञान धासा नं अनुचित ज्वी भस्म ।

माक्सवाद-विज्ञानया विश्व धारणा

व धाःगु स्वं थ्व नं सिया वल कि छुं युग विशेष या भौतिक अवस्था यागु बिश्लेषण याना माक्स थःगु मुख्यगु विज्ञानया सिद्धान्त यात देकुगु मखु, गग मेगु युग या भौतिक परिस्थिति नाप मिले मज्जीगु ख । गथे-एंगिल्स धाई कि “जिमिसं (माक्स व एंगिल्स) इतिहास सुरू ज्वी न्हापा मानव व प्रकृति यागु हानं मानव व मानव या बिचे यागु सम्बन्ध यात माने याना अथवा माला देकागु मखु । ला व हिं वने जूगु मानव रूपी तत्व स्वया जिमिसं प्रारम्भ याना । अमिगु शरीर या क्षुधानं (पित्यागुलि, याना ज्या यायत करं कयंका तल । अमित ज्या यायत मागु, प्रकृति या साथे अमित मजि मगागु सम्बन्ध व अमिगु शरीर या शक्ति यागु गुण लिसे भर परे जुया चोन ।” थुगु प्रकारं दको इतिहास या प्रारम्भ मनुष्य जुया चोन हानं मनुष्य या प्रारम्भ प्रकृति नाप गुकि याना मनुष्य यात जीव दुगु तत्व यागु रूपे पैदा याना विल हानं प्रकृति यागु सक्रिय प्रयोग (ज्या खेले जूगु) गुलि वं याना काय फल उकिया उपरे मनुष्य यात भर विया तल— धैगुलि जुया चोन । मनुष्य म्वाना चोग तत्व यागु रूपे प्रकृति या ज्या खेले जूगु तत्व ख । थ्व धाथे हे सिद्धगु तत्व ख । थुकि याना हानं मेगु स्व थ्व पिहाँ वल कि प्रकृति या उपरे मनुष्य या भरोसा प्रकृति लिसे अलग मामुलि मखु, तर थ्व खास व धाथे हे ख । मनुष्य यात आहारा व सुरक्षा मा । थुकियागु प्राप्ती या लागी ज्या यायगु करं कयं—कमति नं प्रत्येस मनुष्य ल्हा छोया

(ज्या याना) प्रकृति या के नयगु साहारा देकि । वर्षा व चिकुलां थःगु ज्यान बचे याना तेत बस्त्र व बुनियादी चीजत छे देका ठकथा प्वाले चो हुँ । प्रकृति या उपरे खास प्रकार या मनुष्य यात भरोसा मागलिं प्रकृति यात हे हितु-हिका बीगु नं करं क्यना चोन ।

प्रकृति यात हितु-हिकेत अमिसं थःत नं हितु-हिका हेमाल थुकिं याना थ्व खं सिया बल कि “प्रकृति यागु भरोसा दुगु पैदावार या तत्व मनुष्य या ज्यां हे अप्राकृतिया पदार्थ यागु उत्पन्न जुया वैगु व न्हूगु प्रकृति यात पैदा याना बीगु जुया वै ।” डायलेक्टिस—टो० जैक्सन । मार्क्सवाद यागु सम्बन्धे लेनिनं चोगु दु कि “मार्क्सवादी सिद्धान्त सर्व शक्तिमान खः छाय धासा थ्व परमार्थ सत्य ख । थ्व पूर्ण व विरोध रहीतगु (Harmonious) सिद्धान्त ख । थुकिं मानव यात छगु विश्वधारण प्रदान याना बिल । ”

मार्क्सवाद या दर्शन भौतिकवाद ख । मार्क्स दर्शनया भौतिकवाद यात बढे याना हहं पूर्ण याना बिल । प्रकृति या सम्बन्धे थुकिंयागु ज्ञान यात मार्क्स मानव-समाज या परिधीले फैले याना बिल । मार्क्स या इतिहास वैज्ञानिक भौतिकवाद यागु विचाया दकसिवे भिंगु प्राप्ति या मध्ये नं छगु ख । इतिहास व राजनीतिया विचा यागु क्षेत्रे अराजकता व मनमानी गु थासे पूर्ण विरोध रहितगु वैज्ञानिक सिद्धान्त कोटेका बिल । गुब्बेसिनं थ्व पष्ट ज्वीक केना बिल कि गुगु प्रकारं उत्पादन शक्ति यागु सिल-

सिलेवारे विकास या द्वारां सामाजिक जीवत यात छगु चालां मेगु चालाय बदे याना यंकल—गुगु छाँतं सामन्तवाद (Feudalism) या द्वारां पूजीवाद (Capitalism) पिहाँ वल ।” वरु थ्व काल्पनिक समाजवादं जक खःगु लें केना बी मफुत । पूजीवाद या भित्ते ज्याला कायगु व च्यः भ्वातिं जुया चों वनेगु या असलिपना यागु वयान नं थमिसं याय मफुत हानं थमिसं न समाज या शक्ति यात हे केना बी फत, गुकिं याना “न्हूगु समाज” या निर्माण याय योग्य ज्बी ।

“माक्स यागु प्रतिभा (गुण) उकी दु कि दकसिवे न्हापां वेकः नं विश्व इतिहास यागु शिक्षां थ्व मजबून पिकाल । थ्व मजबून छु धासा बर्ग-संधर्ष या सिद्धान्त ख । “माक्स-एंग्लिस व समाजवाद” या पौ ७०, ७१ व ७२—लेनिन ।

द्वितीय अन्तर्राष्ट्रीय माक्सवादी खोल

यात लिक्का वां छोया वीगु युक्ति

एंग्लिस व लेनिन या खँ थ्व स्पष्ट जुया वल कि छुं हे युग विशेष यागु परिस्थिति यात विश्लेशन याना माक्स थःगु मुख्यगु सिद्धान्त यात देकूगु मखु । थ्व ला प्रकृति व समाज यागु विकास या गति यागु सिल-सिला या परिणाम ख—गूगू प्रकारं माक्स द्वन्द्वात्मक भौतिकवाद (Dialectical Materialism) यात देका प्रकृति व मानव-समाज यागु विकास या गति या द्वन्द्वात्मक सिल-सिला यात स्पष्ट याना बिल । उगूहे प्रकारं

थःगु जीवन या प्रारम्भिक कालं निसैं हे मार्क्सवादं वया प्रतिद्वन्द्वी
तेगु नाप सामना याना वबं हानं अमित बुका बिया नं प्रगति
याना हल । दकसिवे न्हापा पूंजीवादी बिद्वान तसें वैत प्याथं
निसैं हे स्याना बीग प्रयत्न यात । अमिग थजाग कोशीस
ज्वीकानं तभी थ्व वदे हे जुया बल । बयां लिउ अराजकतावादी
काल्पनिक व सुद्धारवादी निम्न मध्यम बर्ग या बुद्धीमान तेंपा खें नं
थुकियात विश्वास घात याना बिल । थ्व नोक्सानि याना व
खालि वचे जकजुल नं मखुनि कि हानं अमि प्रतिद्वन्द्वी ते लिसे
हथियार नापं, चले याना वीत लाचार याना बिल । थुगु प्रकारं बेकः
नं थःगु जीवन संघर्ष या संचालन याना मार्क्सवाद बदे जुया वन ।
थुकिया माने ब कदापि मखु कि वैग लें विरोधीत यकदम मरु
धैगु । थ्व सम्भव गथे ज्वी फै ? पूंजीवाद यागु हे ला थौकन्हे
संसार स बोलवाला जुया चोन । पूंजीवाद बिरोधी संग्राम यागु
हेला थ्व बिज्ञान व कला ख । अर्कि गुथाय तक पूंजीवाद यागु
अस्तित्व एकदम मिटे जुया मवनी, उथाय तक य त ला पूंजीवाद
या मुख्यगु सिद्धान्त नाप थुकिया संघर्ष जुया हे चोनी तिनी ।
गुबलें ला थुकियात पिने पाखें हमला ज्वी हानं गबलें थ्वैत दुने
पाखें । मार्क्स यागु जीवन काले हे बाह्य (पिनेयाग) आक्रमण
भचा वः मलाना वन तर पूंजीवादं थुकियात हमला यायीगु बन्द
मजु । थुकिया दुने-दुने हे थ्व हमला आपा बदे जुया बल ।
अर्कि द्वितीय अन्तर्राष्ट्रीय यागु रूप या भित्रे थुकि यागु संगठन
जूगु रूप खने दै बल । लेनिन यागु सफल क्रान्तिकारी नेतृत्वं

याना थ्व हमला यागु सामना सफलता पूर्वकं माक्सवादं याना काल हानं माक्सवाद या खोल चाना वांछोया बीत द्वितीय अन्तर्राष्ट्रीय यात नं लाचार जुल । उखे लेनिन या नेतृत्व ले क्रान्तिकारी शक्ति पूजीवादी गढ़े हमला या उपरे नं हमला याना बिल । अन्त स संसार-व्यापी पूजीवाद यागु किलाबन्दी दलाल त पैदा याना हेगुली थमिसं फत्य याना काल । थ्व यां लिउ मेगु थासे नं पूजीवाद यागु विरुद्धे शोषित श्रमिक जनता यागु क्रान्तिकारी आला पिहाँ वल गुकिं याना तृतीय अन्तर्राष्ट्रीय यागु रूप धारणा यानाँ हल । हाकनं बिश्वव्यापी पूजीवाद-साम्राज्यवाद या खिलाफे जीवन मरण यागु क्रान्तिकारी संग्राम या संचालन थुकिं याना हल । आः तक नं संसार-व्यापी प्रतिक्रियावादी-पूजीवादी-साम्राज्यवाद या हि नुली यको हे हि व्वाना चोन तिनी । आः नं थमिसं हथियार तोता बीत तैयार मजु नि । ढः स्वना हे थमिसं न्हाथासं बोला स्वाना चोन तिनी । गन अपि थ्यंकः वने मफै, अन अमि दलाल त निम्न मध्यम वर्ग या पूजीवादी बिद्वानत थ्यंकः वनी हानं अन थमिसं पूजीवाद-साम्राज्यवाद यागु लट्ठा ढस्वाका तेत थमिसं कोशीस याईगु जुया चोन ।

तृतीय अन्तर्राष्ट्रीय यागु स्थापना

गुथासं निसें पूजीवादं साम्राज्यवाद यागु रूप धारणा याना बिश्वव्यापी जुया वल, उथासं निसें प्रत्येक पूजीवादी देशे थुकिया खिलाफ क्रान्तिकारी शोषित श्रमिक जन यागु मिं कन तचो जुया वल हानं १९१७ ई० ले थ्व क्रान्तिकारी जन उभारं समाजवादी

क्रान्ति (Social Revolution) यागु रूप धारण याना संसार-
व्यापी पूंजीवाद या बीचे तगाक गाः छगा ह्यु या बिल हानं उकिया
साथें हे श्रमजीवी वर्ग यागु सर्वहारा या अधिनायक-तन्त्र नं स्थापित
जुल । संसार व्यापी पूंजीवाद-साम्राज्यवाद या खिलाफे क्रान्ति-
कारी श्रमिक शोषित जन उभार यागु थ्व केन्द्र (दुवा) जू बन ।
थनं निसे लेनिन यागु क्रान्तिकारी मार्क्सवादी नेतृत्व ले थ्व चले
ज्वीगु जुया बल । गुह्येसिनं याना तृतीय अन्तर्राष्ट्रीय या
संगठन जूगु या रूप ग्रहण याना हल ।

लेनिन या नेतृत्व ले बिश्व पूंजीवाद-साम्राज्यवाद या खिलाफें
संसारव्यापी क्रान्तिकारी श्रमिक “जनमोर्चा” यागु संचालन तृतीय
अन्तर्राष्ट्रीय यागु द्वारां चले जुया बल । थ्व मोर्चा यागु मुख्य
आधार व खः कि मेमेगु देशे नं प्रतिक्रियावादी व्यवस्था यात स्यंका
बीत क्रान्तिकारी श्रमिक शोषित या “जन-संग्राम” यायगू थ्व
बिश्व बिसवी मोर्चा या बल्लागु व कड़ागु धार (प्रगति) यागु
चोट या अनुभव पावे जुया बिश्व पूंजीवाद-साम्राज्यवाद ग्याना हिले
जू बन । अर्कि थुकियात स्यंका बीत थमिसं ज्यान बिया आपाहे
कोशीस यात । पिने व दुने पाखें थुकियात हमला जुया बल ।
थुकिया दुने गन थः (पूँजीवादी-साम्राज्यवादी) द्वाहाँ वने मफुत ।
अन दुने हे थुकियात स्यंका वी मजी मगागु (आवश्यकता) समझे
जुल । अर्कि अन अमि दलाल बुजुआ पंडीत (मध्यम व निम्न-
मध्यम वर्ग या बुद्धीमान) तेत थ्व ज्याखं या भाला बिल ।
प्रत्येक देशे मध्यम व निम्न-मध्यम वर्ग, या बुद्धीमान तसें थ्व

मोर्चाय प्रवेश याना हानं थुक्रियागु संचालन या नेतृत्व अमिसं थःगू हे ल्हाती तै काल । अमिगु नेतृत्व पावे ज्वी धुनेव हे थुक्रियागु (तृतीत अन्तर्राष्ट्रीय यागु) क्रान्तिकारी आचरण यात खतम याना सुद्धारवादी आचरण प्रदान याना थुक्रियागु संचालन याना हल ।

स्टेलिनवाद

लेनिन सीगुलिं याना थमित यको हे याउल । तर भीसं थ्व खँ लोमंके मज्जू कि विश्व पूजीवाद या स्तम्भ दकसिवे बल्लागु पूजीवादी बिचार धारा धका ख । पूजीवाद बचे ज्वीजु थ्व आपाहे तःथंगु शास्त्र जुल । लेनिन सी धुसेंलि तृतीय अन्तर्राष्ट्रीय यागु रूपें विश्व व्यापी क्रान्तिकारी श्रमजीवी या मोर्चा स स्तेलिन व ट्राटस्की या मध्यम व निम्न-मध्यम बर्ग या सुद्धारवादी सिद्धान्त दोँ याना हल । ट्राटस्की या भनाई थ्व कि लिपा लाःपिं कृषि प्रधानगु देशे, यदी श्रमजीवी वर्ग राज्य सत्ता स कब्जा हे याना काः सानं तभि, व तातक अमिगु ल्हाते तइ ते फै मखु । विश्व श्रमजीवी क्रान्ति या लागी हानी ज्वी गुली जुया चुंचोन । समाजवाद यागु क्रान्तिकारी अन्तर्राष्ट्रीय या रूप यात राष्ट्रया रूपे हीका, छगुहे जक देशेन समाजवाद या पूर्ण सफल स्थापना जुईगु अवैज्ञानिक व अमाक्सवादी सिद्धान्त स्तेलिन देका विल, गुकिं याना सम्पूर्ण विश्व पूजीवाद-साम्राज्यवाद बिरोधी विस्रवी श्रमीक शोषित जन मोर्चा यागु रूप हिला वन । ट्राटस्की व स्तेलिन यागु व निम्न-मध्यम वर्गया अमाक्सवादी सिद्धान्त यागु फल स्वरूप नया जन-

तन्त्र (New Democracy) जुल । थौंकन्हे ध्व अनेगु नक्शां
पूँजीवादो या पोषक जुया चुंचोन ।

तृतीय अन्तर्राष्ट्रीय या सोवियत रूस यागु अन्तर्राष्ट्रीय किलाबन्दी यागु रूप स ।

लेनिन सी धुसेलि विश्व पूँजीवाद-साम्राज्यवाद विरोधी
बिसर्वा श्रमिक शोषित जन मोर्चा यागु नेतृत्व स्तेलिन या ल्हाती
लाः वल । थुकियात ज्वने साथ हे व थुकियात क्रान्तिकारी
अन्तर्राष्ट्रीय यागु रूप यान स्यंका राष्ट्रीय या रूपे स्तेलिनं हीका
बिल । छगु हे जक देशे नं समाजवाद या पूर्ण सफल स्थापना जुई
गु सुद्धारवादी-समाजवाद यात रुसे स्तेलिनं ज्या खेले याना हेगु
कोशीस याना हल । ध्व कोशीसं याना विश्व पूँजीवाद-साम्राज्य
वाद विरोधी अन्तर्राष्ट्रीय यागु बिसर्वा श्रमिक शोषित जन मोर्चा
सोवियत रूस यागु राष्ट्र या वैदेशिकनीति या अन्तर्राष्ट्रीय यात
किलाबन्दी या रूपे हीका बिल । उथासं निसें हानं आतंकनं
ध्वहे आधार स ध्व ज्याख चले जुया चुंचोन ।

पूँजीवाद-साम्राज्यवाद विरोधी अन्तर्राष्ट्रीय श्रमिक शोषित
जन मोर्चा यागु सम्बन्धे मार्क्स यागु विचार यात स्तेलिनं आः
यागु भौतिक परिस्थिति नाप मिले मजगु प्रमाण केनेत नं कोशीस
यात । स्तेलिनं धाल कि “वंगु शताब्दी या पीं दं या भित्रे; गन
आ तक नं एकाधिपतिया पूँजीवाद मरु नि, गन पूँजीवाद या
ढाँचा छगुलिं उठे जुया वंगु रेखा लिसे कठहनं बढे जुया बना

चुंचोन व भूखण्डे गन आतक नं थ्व अधिकार मरुगु ख, अननं थ्व सरें जुया वना चुंचोन हानं असम विकास यागु सिद्धान्त आनं सिद्धगु रूपं चले ज्वी मफै चोन, अले मार्क्स व एंग्लिसं थ्व ईरादा यात कि “समाजवादि क्रान्ति छुं छगु जक देशे सफल ज्वी फै मखु, थ्व फुक वा आपा ल्याखं सम्य देश यागु सकसिगुं ढक्का या फल स्वरूपं हे जक त्याका काय् फै ।” थ्व ईरादा मार्क्सवादीत सकस्यां लागी लँ केनीगु जुल ” स्क् सोवियत साहित्य संख्या नं० ६, १९५० । स्टेलिन यागु व खं स्पष्ट जुया बल कि छगु देश या भित्रे समाजवाद या पूर्ण सफल स्थापना छ खे हे लात, अले मार्क्स या अनुसारं छगु देशें सफल समाजवादी क्रान्ति नं सम्भव ज्वी फै मखु घैगु ख थ्व ठीक हे जू कि मार्क्सवाद-लेनिनवाद यागु अनुसारं छगु देश या भित्रे समाजवाद या पूर्ण सफल स्थापना सम्भव मरुगु ख । तर मार्क्स व एंग्लिसं गवलें थथे धागु मरु कि छगु देशे समाजवादी क्रान्ति सफल ज्वी मखु धका । खालि वेकः नं थुकियागु समर्थन जक मखु कि वेकः नं सफल यायगु नं कोशिस यागु दु । सन १८७१ ई० ले फ्राँस यागु पेरिस शहरे अनयापिं मजदूर तसें हुहुमते कब्जा यात । उकिया पूर्ण समर्थन मार्क्स यात हानं पूरा फ्राँस्मे समाजवादी क्रान्ति यागु सफल याय गुली वं कोशिस यात । पेरिस या मजदूर राज यागु आधारे वेकः नं श्रमजीवी वर्ग यागु श्रं णां अधिनायक तन्त्र यागु रुप रेखा चोल । मार्क्स यागु बिचा या विषय ले व खं गुगु स्टेलिन वयान यात, व खालि ज्वी मफैगु खं धका तोह चिना क्रान्तिकारी श्रमिक शोषित जनता याके मार्क्स-

वाद या उपरे विश्वास मयाकेत स्तेलिनं थथे धागु ख; छाय धासा
रुसे समाजवादी क्रान्ति सफल जुल हानं वयां लिउ थथे धाय
थव्यु कि मार्क्स ला धागु दु कि समाजवादी क्रान्ति सफल ज्वी फै
मखु धका । थुकिंयाना मार्क्स यागु मलगु सिद्धान्त यागु उपरे
पत्या मदै वनी धैगु थजागु आशां स्तेलिनं थथे धाल ।

स्टेलिनवाद यागु वर्ग सहयोग सिद्धान्त

या खें अन्तर्राष्ट्रीय क्रान्ति यागु बलिदान

दकसिवे न्हापा 'समाजवादी क्रान्ति' यागु लड़ाई छिडे
नूगुलिं याना सापहे ग्यानापुसे चोंगु परिस्थिती नं विश्व पूंजी-
वाद-साम्राज्यवाद यात मुक्त याना मव्यु । लड़ाई सिधे धुंका नं
हानं थव संकट भन हें आपा बढे जुया वल । सन् १९२६ ई०
यां लिउ अक्तू थव संकट भन आपा बढे जुया थुकिंयागु रूप
भयानक जुया पिहाँ वल । गथे-गथे थव भय आपा खने दै वल,
अथे-अथे हानं थपिं वें छट-पटे जुया वें चाया वल । थव वें चाः
गुलिं याना लोक विरोधीखँ (Fascism) यागु रूप धारण याना
हका-हक हे खने देक पिहाँ वल । थुकिं याना सोवियत रुस यात
भन आपा भय खने दै वल । थव भयं बचे ज्वीगु लागी विश्व
पूँजीवाद-साम्राज्यवाद विरोधी अन्तर्राष्ट्रीय विसर्वात्मिक शोषित
जनमोर्चा यात फकोभनं वल्लाका हानं ज्याचले याना हेगु आपा
खाचो जुया चोन, तर अथे मयासे भन उल्टा वर्ग सहयोग यागु
प्रतिक्रियावादी सिद्धान्त या आधारे, मेपिं साम्राज्यवादी तेगु नाप
संयुक्त मोर्चा देक। सोवियत रुस यागु ज्यान बचे याना तेगु

कोशीस स्टेलिन यांना हल । स्टेलिन या सोवियत रुस यागु वर्ग सहयोगी सुद्धारवादी वैदेशिक नीति यागु अनुरूप आपाहे देशे स्टेलिनवादी कम्युनिष्ट आन्दोलन वर्ग सहयोग यागु सिद्धान्त या आधारे चले ज्यीगु जुया वल ।

तःगु देश या लोक विरोधी (Fascist) तेगु कल्पनाया भयं बचे ज्यीत व 'शान्ति-सुरक्षा' कायम यांना तेगु या लागी पूंजीवाद-साम्राज्यवाद विरोधी विस्रवी श्रमिक शोषित जनमोर्चा यात स्यंका उकिया थासे पूंजीवादी वर्ग व मध्यम वर्ग या नाप-नापं वर्ग सहयोगी संयुक्त मोर्चा देका, हल हानं स्टेलिनवादी कम्युनिष्ट तसें पूंजीवाद-साम्राज्यवाद नाप त्वाय चिंगु सम्बन्ध नं तोपुया तेगु ज्याखें लगे जू वन । समाजवाद या स्थापना, समाजवादी क्रान्ति व सर्वहारा या श्रेणी अधिनायक तन्त्र यान सन० १९३५ ई० नं निसें स्टेलिनवाद (सुद्धारवादी वर्ग सहयोगी सिद्धान्त) या खें बौ बिल । अनं निसें वया हानं आ तक नं गनं हे गुगु देशे नं स्टेलिनवादी कम्युनिष्ट आन्दोलन या उद्देश्य समाजवादी क्रान्ति श्रमजीवी वर्ग यागु तानाशाही व समाजवाद या स्थापना यायगु ज्याखें मजुया वल ।

फैसिस्टवाद या भित्रे शान्तिमय जीवन सम्भव दैला ?

(क) साम्राज्यवादी ते नाप मिले जुया चोनेगु संयुक्त मोर्चा यात कः धाना तेगु सामर्थ मदस्यं लि फैसिस्टवादी जर्मनी ते नाप त्वाय चिना स्टेलिन सोवियत रुस यात बचे यांना तेगु कोशिश यात । जर्मनी व रुस या बीचे सन्धी (Pact) जुई

छगु हत्ता यां न्हापा फ़ैसिस्टवादी जर्मनी तसें प्रजातान्त्रिक पोलैन्ड या उपरे हमला याना विल । अनलि पोलैन्ड इना कया जर्मनी व रुसें मिले याना छोट । वयां लिउ रुस व जर्मनी या बिचे सन्धि जुल । उकी नं अथे धाल कि “पोलैन्ड यागु दको राज्य यात स्यंका बी धुसेंलि अन हानं शान्ति-सुरक्षा (Peace & Order) कायम याना तेगु व अन यार्पि निवासी तेगु या लागी शान्तिमय जीवन कायम याना बीगु ज्याखें नं जर्मन व रुस या सरकार पिनिगु परम कर्तव्य भापा चुंचोन ।” छको बिच्चा याना स्वं कि लोकबिरोधीखं (Fascist) या भित्रे शान्तिमय जीवन सम्भव दैला ?” लेखक ।

(ख) “जर्मनी व रुस निगु राज्य या बिचे चिन्ह तैतःगु सीमा निगु राज्य यां हितगु आखिरी सीमा भापा चोन हानं उकी मेषि सुं बिदेशी (स्वह्म खल) वया अमिगु बलं थुकि हस्तक्षेप यात धासा थपि निगु देशं छगु ज्वीक मिले जुया अमिगु बलं थमित पितिना छोय 'धैगु थजागु फ़ैसिस्ट जर्मन व सोबियत समझौता यां लिउ ता० २८ सेप्टेम्बर १९३९ ई० या दिने बर्लिन व मास्को या निगु सरकार पिनिगु पाखें नं अथे धका जाहेर ज्वीक नाय्खीं च्वे का बिल कि जर्मनी व रुसया सरकार पिनी बीचे जूगु समझौता या भोटे थौं सही-छाप ज्वी धुंकल । “माने पोलैन्ड यागु राज्य सतम ज्वी धुसेंलि गुगु सवाल पिहाँ ओगु ख, वखें मिले ज्वी धुंकल हानं “पूर्वया यूरोपें सदां शान्ति व सुरक्षा याना बीगु दइ आधार या निर्माण ज्वी धुंकल हानं अमित परस्पर समता व

विचारे जर्मनी व फ्रांस यागु बिचे या युद्ध यात अन्त यात्ता बीगु ज्याखँ नं दको राष्ट्र या हीत जुई” धका धाल ।

अथेया लागी यदी माला वन धासा नं निगु देश या सर्कार पिसं अमि मित्र राज्य पित सहयोग बीगुली याकनं थव ज्याखँ पूरा याभगु लागी कोशीश याई ।

यदी सफल मजुल धासा ला लड़ाई छिड़े यायगु या जिम्मा वाल फ्राँस व ग्रेट ब्रिटेन जू वनी । थजागु घड़ी जर्मनी व रुस या सर्कार पिसं मागु कारवाई यायत्त सल्ला बी ।

तृतीय अन्तर्राष्ट्रीय विश्व पूंजीवाद यागु खे वलि दान ।

थव घोषणा व समझौतां याचा सोवियत रुस यात लड़ाई यागु भयं वचे ज्वीगु असम्भव जुया वल । सन १९४१ ई० या जून महिना स फ़ैसिस्टवादी जर्मनी तसें सोवियत रुस या उपरे हमला हे सुरू याना विल । उथाय विश्व पूंजीवाद-साम्राज्यवाद बिरोधी बिसबी कमिक शोषित जनमोर्चा यात स्तेलिनवादं ध्वंस यानावी धुंकल, गुगु ख, छगुहे जक उपाय सोवियत रुस यात लड़ाई यागु भयं वचे ज्वी फ़ैगु आधार दु । अले “छु जुल ले ? “धासा । सोवियत रुस यागु रक्षा या लागी लड़ाई चले याना तेगु जिम्माबालत साम्राज्यवादी ग्रेट ब्रिटेन व अमेरिका नापं स्तेलिनं ल्हा जों वने माल । उलि जक मखुनि कि हाकनं अमिगु हे नेतृत्व ले विश्व पूंजीवाद-साम्राज्यवाद यागु ज्यान वचे याना तेगु कोशीश प्रत्येक देशे स्तेलिनवादी कम्युनिष्ट तसें पूंजीवादी व साम्राज्यवादी ते नाप मिले जू वन । थव इरादा सफल ज्वीकेगु हेतु हानं तृतीय अन्तर्राष्ट्र यात नं ध्वंस ज्वीक स्यंका बिल ।

पूँजीवाद व समाजवाद या शान्तिमय जीवन ?

लड़ाई बन्द जुल । अथे नं सोबियत रूस यागु ज्यान बचे जूगु बांलाक खने मरुनि । थुकियात बचे याना तेगु सवाल खना पासा० स्तेलित हैड़ान जू वन । थ्व हैड़ानी व वेचैनी या घड़ी वेकः नं थथे धै हल कि “पूँजीवाद व समाजवाद तांतकं शान्ति पूर्वकं चोने फु धका ।” स्तेलिनवादी तेगु विचारे ला संसारे सुंहे मनूत थथे मज्जीकेत कोशिस याना हल । अमित करं क्यंकेत पूँजीवाद व समाजवाद या बीचे मिले ज्वीगु या आधारे विश्व ब्यापी स्तेलिनवादी कम्युनिष्ट आन्दोलन छिड़े जुया वल । थ्व श्रमिक वर्ग यागु विश्व क्रान्ति या लागी घातक जुया विश्व पूँजीवाद या पोषक जू वन । अर्किंला पूँजीवाद व समाजवाद या शान्तिपूर्वकं आपा तक त्यक्के ज्वी फुगु ख ।

मार्क्सवाद यागु मूल सिद्धान्ते स्तेलिनवादी

परिवर्तन या खाचो

यदी शीपिं व स्यापिं विस्रबी श्रमिक जनता याके मार्क्सवाद-लेनिनवादे पूरा विश्वास दु धैगु जूसा, ला थ्व स्तेलिनवादी शान्ति या भित्रे अशान्ति जुया वैगु आपा हे भयस्वने दु । अर्किंला पासा० स्तेलिन यात थजागु युक्ती याय् मागु खाचो जूगु ख । बखँ थ्व कि मार्क्सवाद या उपरे श्रमिक वर्ग याके विश्वास मदेका बीत कोशीश यायगु । छगु समय भारत याह्य मध्यम वर्ग या प्रजातान्त्रिक समाजवादी आन्दोलन या

नाय० श्री जय प्रकाश भाजुं नं थजागु हे कथं खं ल्हाय् गु वान्हि पिकाग् दु कि “समाजवाद की मेरो चित्र” धैग् सफुली वेकः नं चोगु दु दि “मार्क्स या युगं निसें वया आतक या भित्रे विज्ञानं नं यको हे उन्नति याना हे धुंकूगु दु, अर्कि मार्क्सवाद यागु मूल सिद्धान्ते नं हीकावी मागु खाचो ज्ञी धुंकल धका ।” रूस या स्तेलिनं नं भन्दै थथे हे चोल कि “छिगु सफू शीगु छाँतं निगु खं जोना न्हां वना चुंचोन । छगु खं थ्व कि मेपि रचयिता यागु रचना यात वैगु इतिहासया म्यादं छखे तया सारे याना बीगु धाय् लायकगु हे खं ख हानं मेगु थ्व खं मान्य जुया कि मार्क्स यागु छुं विश्वास व सिद्धान्त गुगु इतिहासया विकास यागु छगु म्याद यात स्वैगु या फल स्वरुपं दुगु ख विकास या दको युग या लागी ज्युगु सत्य ख हानं उकिया लागी व हीके स्वागु ख ।”

जिला अवश्य धाय हे मा कि थ्व निगु भनाई नं सरासर गलती व भूठ ख । सोवियत साहित्य संख्या ल्या० ६, १९५१ ई० मास्को लेनिन व एंग्लिसं व धागु खं थ्व खने धुंकूगु दु कि छुं युग विशेष व देश विशेष यागु परिस्थिति स्वयागु या परिणामं मार्क्सवाद यागु मूलगु सिद्धान्त देकूगु मखु थ्व ला खालि क्रान्तिकारी श्रमिक शोषित जनता यात तोह पिकया केनेगु या नीयतं हे जक स्तेलिनं थथे धागु ख ।

वहे लेख स न्हापा पासा० स्तेलिनं चोल कि.....
 एंग्लिसं वैगु सफू ‘एन्टी यू रिंग’ स चोल कि समाजवादी क्रान्ति यागु पूर्ण सफलता या लिउ राज्य शक्ति कम जुजुं लोप जुया बने

मा धका ।..... गन समाजवादी क्रान्ति या छगु देशे विजयी जुल, मेगु दको देशे पूंजीवाद यागु राज्य जुल हानं विजयी क्रान्तिगु देश यदी पूंजीवादी घेरां मस्त्रं केगु जूसा, ला अमिसं राज्य शक्ति यात अवश्य हे कमजोर याना बी मज्यु, अले ह्यागु तरह नं थःगु राज्य, या भांग, बुद्धी दुपिं मनू तेगु ल्या व सेना इत्यादि यात बलाका हे मा । (थ्व समाजवाद ज्वी मखु, थुकि-यात समाजवाद यागु नां मीगु श्रमजीवी वर्ग यागु क्रान्ति या साथे विश्वासघात यायगु जुई)-लेखक । रूसया मार्क्सवादी थ्व विश्वासे थपंकः बल कि एंग्लिस यागु दको फुकं अथवा आपा ल्याखं या देशे समाजवादी क्रान्ति यागु सफलना या लागीं लगे ज्वीगु ख हानं गन पूंजीवादं मैगु दको देशे राज्य याना चुंचोन धासा अजागु घडी, यदी समाजवादी क्रान्ति या खालि छगु जक देशे सफल जुल धासा, ला थ्व सिद्धान्त लगे ज्वी मखु ।

“स्पष्ट खनहे दुगु रूपं मीगु न्हेवने समाजवादी राज्य यागु भाग्य या सवाले तिगु सिद्धान्त खने दु, गुगु छगु लिसे मेगु मिले मजू ।.....थजागु प्रमाण या संख्या आपा देफु ।” सोवियत साहित्य संख्या ल्या० ६ १६५० मास्को ।

स्टेलिन यागू व खं थथे सिया बल कि “राज्य या विषय ले मार्क्स एंग्लिस यागू मूलगु सिद्धान्त आः यागु भौतिक परिस्थिति ले लगे ज्वी मखुत धैगु । छायधासा आः यागु भौतिक परिस्थिति यात स्वया हानं बिचा याना सोगु आधारे वेकः पिसं थ्व सिद्धान्त देका व्यूगु मखु ।—“पासा० स्टेलिन यागु थ्व जिद्दी

फुक मखुगु व सरासर ढोखा ख मानव समाज यागु दको विकास या विषय यात सीका हानं विश्लेषण याना सोगु आधारे मार्क्स व एंग्लिसं राज्य यागु विषय ले दकसिवे भिंगु व मूलगु सिद्धान्त यात देका व्यूगु ख । वेक पिसं भीत छु युग विशेष बा देश विशेष यागु भौतिक परिस्थिति स्वया हानं विचा याना देका व्यूगु मखु । आः थौं कन्हे यापि घोर प्रतिक्रियाबादि मार्क्सवाद विरोधी तसैं थथे धका धै जुल कि “मार्क्सवाद धैगु छु युग विशेष व देश विशेष यात स्वया मार्क्स व एंग्लिसं देका व्यूगु सिद्धान्त” धका ।

नेपाया पुलांगु साहित्य सामन्तवादी व पूँजीवादी बुजुआ पन्डीत तसैं थौं कन्हे तक नं थथे धया जुल तिनी कि “मार्क्सवाद धैगु छः (ईश्वर) यात मान्य मयायीगु व बुढा थकालि मयासे बुद्धी थकालि ज्वीगु व ज्या मयापिं च्वे मतसे ज्यायापिं च्वे छुसे छुयी गु नास्तिक मत धका ख अकिं थ्व मत यात मान्य याय् मत्यो धका गं जुल । तर थ्व खँ सगसर झूठ व फरेप ख । आः नं भीगु देश नेपा हानं विदेश भारत व पाक आदि थजागु गरीब देशे ला मार्क्सवाद यागु मूल सिद्धान्त भन हे आपा लगे ज्वीगु चीज खःनी हानं दुनियाय् दक्को श्रमिक शोषित जनता या विश्व क्रान्ति यागु लागी ला भन हे आपा ज्याः लगे जूगु चीज तिनी । मार्क्स धागु दु कि “थ्व सिद्धान्त अले तिनी ज्याः लगे मज्बी जव मानव समाज हें मदै वनी धका ।” छाय् धासा मार्क्स राजनीतिया क्षेत्रे अराजकता व मनमानिपन गु थासे पूर्ण विरोध रहीत गु बैज्ञानिक सिद्धान्त पत्ता लगे याना देका बिल । अकिं थ्व

सिद्धान्त मानवता या छगु आदर्श या रुप मानव समाज गुथाय तक दै चोनी उथ य् तक थव सिद्धान्त लगे जुया चुंचोनी।

थव नं धागु ठीक हे जू कि पूंजीवादी संसारं सोवियत रुस यागु राज्य या अंग व राजनीतिया यन्त्र कठहनं तः धना हानं बलाना वैं चुंचोन, गुगु समाजवाद यागु पूर्ण सफल ज्वी धुंका ज्वीगु असम्भवगु चीज ख । स्टेलिनं थथे नं धागु दु कि “सोवियत रुसे समाजवाद यागु पूर्ण सफल स्थापना ज्वी धुंकल । आः हानं साम्यवाद (Communism) यागु स्थापना यायत तत्पर जुया जोर नकसां न्हा वना चुंचोन हानं उकिया साथ-साथे अन यागु राज्य यन्त्र नं बिना लोप मजुसे धराधर चले हे जुया चुंचोन धका ।” पासा० स्टेलिनं थव धागु खं या पूरा मतलब व कि आः यागु भौतिक परिस्थिती मार्क्सवाद यागु मूल सिद्धान्त ज्या लगे मज्वी धुंकल हानं थःगु दोगु ज्याख यात वास्ता हे मतसे थःगु हे जक खं जेथे लाका तेगु बा माने वर्ग सहयोगी सुद्धार-वादी व विश्वक्रान्ति बिरोधी सिद्धान्त या प्रचार याय् गु या सिवा मेगु छुं मखु । थजागु ज्याखं याना क्रान्तिकारी ज्यायायीपिं शोषित जनता यागु विश्व क्रान्ति या लागी आपा हे नोकसानी जू वने फु ।” लेखक ।

समाजवादी क्रान्ति यागु इतिहास या मुख्य ज्याखं

पूँजीवादी व्यक्तिगत सम्पति यात नाश यायगु

पूँजीवादी राज्य यन्त्र यात स्यंका बी धुने व समाजवादी क्रान्ति या मेहनती जनता यागु श्रेणी अधिनायक तन्त्र यागु रुप

पिहाँ वै । पूंजीवादी व्यक्तिगत सम्पत्ति यात नाश याना देशे
 दको सम्पत्ति समाज या सम्पत्ति याना बीगु हे समाजवादी
 क्रान्ति यागु इतिहास या मुख्यगु ज्याखँ जुई । थ्व इतिहास
 यागु ज्याखँ न्हेअने क्रान्तिकारी श्रेणी संग्राम यागु ज्याखँ चले
 याना तया ह्यगु ब उकियात बढे याना हेगु जुया वै ।
 थ्व श्रेणी संग्राम देश व्यापीगु रुप धारणा याना समाजवादी
 क्रान्ति यागु रुप बांलाक खने दया वे । थुकिंयाना मेहनती
 जनता यागु क्रान्तिकारी श्रेणी या नेतृत्व ले चले ज्वीगु शीर्षि व
 स्यापीं क्रान्तिकारी मेहनती जनता यागु जन संग्राम (वर्ग संघर्ष)
 यागु क्रान्तिकारी तत्व व वर्ग चेतता बढे जुया वै, गुगु कठहतं
 क्रान्तिकारी मेहनती जनता पिनिगु जनमोर्चा तागु रुप सम्बन्ध
 मिले जुया हानं थपिं सकलें छथाय् मुं वया थमिगु बांलाक संग-
 ठन जूगु रुप खने दया वै । बढे जुजुं हानं बलाना पूंजीवाद व
 पूंजीवादी राज्य यन्त्र यात फुक स्यंका बीत क्रान्तिकारी ज्यायायी
 पिं मनू तेगु पार्टी ले थ्व मोर्चा यागु रुप खने दया वै । थुकि-
 यागु नेतृत्व ले क्रान्तिकारी ज्यायायीपिं शोषित जनतां पूंजीवादी
 व्यक्तिगत सम्पत्ति व पूंजीवादी राज्य यन्त्र या उपरे हमला याना
 बी । थमिगु टाकत या न्हेअने पूंजीवादी राज्य यन्त्र टातक
 अढे जुया चोने फै मखु । अले थ्व क्रान्तिकारी यागु मिं या
 ज्वालां भस्म जुया फुना वनी । थजागु किसिम या क्रान्तिकारी
 ज्यायायीपिं शोषित जनता यागु जन उभारं याना खालि पूंजीव दं
 लट्ठा जक कोथला नं मद्य् से क्रान्तिकारी या शक्ति नं प्रकाश जुया
 हानं भनब ल्लाना बढे जुया वै, गुकिं याना ज्याया इपिं जनता यागु

श्रेणी या मनपरी यागु रुप कहनं बांलाक खने दया वै । थपिं फुक छपं जुया हानं पूजीवादी बन्दोबस्त व पूजीवाद यागु नाम निसाना हे मदेक स्यंका फुका बीत कोशीश या वनी । थ्व ज्याख छन्हु निन्हुं सिधैगु ज्या मखु ।

थ्वला छगु ताहाकगु समय यागु ज्या जू बनी । पूजीवादं साम्यवादे मानव समाज यात हीका (परिवर्तन) याना बीगु थ्व हे समय ख । अकिं पूजीवादं वया साम्यवादे तक यात छगो देग अथवा छगू फुक इतिहास यागु ज्याख धै तल । लेनिनं चौगु दु कि सामन्त व बुजुआ तेत शासन पदबिं हटे याना बी धुने व थ्व बुजुआ व पूजीपति खल तंगु बिरोध भन आपा भिगु दुगुता बढे जुया वे । थ्व गहीं कोटुं वपिं भुस्यत (पदच्युत) जूसानं तभि अथेनं यको हे बल्लापिं शत्रुत जुया पिहाँ वै तिनी । अकिं हे थ्व सापहे मभिपिं शत्रुत पूजीपति खल या विरुद्धे न्हगु वर्ग यको बल्ला गु व निर्मम संघर्ष यागु नाम हे “सर्वहारा या मनपरी” (Dict atorslib of Proletariat) धागु ख ।

“हाकनं सर्वहारा या मनपरी धैगु छगु किसीमं मदिक चले जुया चुंचोनीगु ल्वापु ख, गुकिं याना पुलांगु व मभिगु समाज या टाकत व चाला या विरुधे शान्ति पूर्वकं वा अशान्ति पूर्वकं, हिंसात्मक अथवा अहिंसात्मक, सैनिक व धनया परिस्थिति स्वया शिक्षा व शासन यागु वन्दोबस्त या उपायं मदिक चले ज्वीगु हे लेनिनवाद यागु मुख्य सिद्धान्त ख ।”—स्टेलिन ।

मार्क्सवाद व लेनिनवाद यागु रूपै —स्टेलिन

मार्क्सवाद व लेनिनवाद यागु रूप स पासा० स्टेलिन भाजुं स्टेलिनवादी ज्वी न्हापा चोगु दु कि “न्हापा ज्यापु ज्यामि तेगु क्रान्ति यागु अवस्था यागु विश्लेषण अलग-अलग देश यागु धन या स्थिति स्वया हानं उकियात ध्यान तथा ज्याखँ यायीगु जुया चुंचोन । उकी आः थ्व दृष्टिकोण (विचा याना स्वेगु) म गाय धुंकल । आ खँ पिहाँ वै चोन कि आपा अथवा भन्दै फुक देश यागु धनया स्थिति यागु दृष्टिकोणदको दुनियाँ यागु स्थितिय । दृष्टिकोण विचा याना स्वै हे माल । छाय् धासा अलग-अलग देश या अलग-अलग राष्ट्र यागु धनया खाचो अथेतुं गनं हे पूरा जू मवे धुंकल । थ्व बन्दोवस्त छगु हे ढाचां विश्वव्यापी धनया बन्दोवस्त यागु माः चिना वे धुंकल । माने-पुलांगु चाला या सुसंस्कृत पूँजीवाद (लाय्खँ) आः थौं कन्हे साम्राज्यवाद (Imperialism) यागु भयानकगु रूप धारणा याना हे धुंकल ।

न्हापा छुं देश विशेषे वा थथे धाय्गु यको हे ठीक जू कि छुं छगु अथवा मेगु विकास जूगु देशो सर्वहारा क्रान्ति या लागी त्यगु परिस्थिति यागु उपस्थिति अथवा अनुपस्थिति यागु खं ल्हाई; तर आः थ्व दृष्टिकोण कम ज्वी धुंकल । आः भीसं साम्राज्यवाद यागु छत्र छाँया यागु पूर्ण विस्तार यात छगु हे विश्व व्यापी व्यवस्था मान्ये याना हानं उकिया लागी क्रान्ति याय्त लायकगु परिस्थिति यागु उपस्थिति अथवा अनुपस्थिति या ख


ल्हाना हे माल । थ्व बन्दोवस्त या भित्रे छुं थजागु नं देशत दे फु कि गूकी मा छी उद्योग या बिकास आः तक नं ज्वी मफुनि । तर व पूरा व्यवस्था अथवा आपालं खःगू खं थ्व ज्वी कि छाय धासा पूरा बन्दोवन्त क्रान्ति या लागी तैयार ज्वी धुंकल, उकिया लागी छुं अबिकसित अथवा उन्नति मरूगू छुं थजागू देशत दुसानं क्रान्ति यागु लें छुं अपाय्चो तधंगु बाधा परे ज्वीफै मखुत ।

न्हापा छुं थ्व अथवा व खासयाना बिकास जूगू देमे जक सर्वहारा क्रान्ति यागु खं पिहाँ वैगु खः (थजागु खं सुनां ल्हाना हैगु ? छाय अननं कार्ल मार्क्स व एंग्लिसं हे जक लहा वैगु ज्वीला ?—लेखक । हाकनं व देश या क्रान्ति याय्त व देश या पूंजीवाद या बिरुधे आवाज पिकाय्गू छगु मन मौज व थः थमं हे जक मजि मगागु चीज समझे जुया लहागु ख । परन्तु आः या धडीं थजागु बिचारं स्वेगु नं पूरा मज्वी धुंकल । आः “विश्व क्रान्ति” (World Revolution) यागु खं ल्हाना हे माल छाय धासा आः पूंजीवाद या अलग-अलग गू राष्ट्र या मोचा छगू मेगु नाप मिले जू वने धुंकल हानं साम्राज्यवाद यागू छगू हे विश्वब्यापी मोर्चा या अंग जुया वे धुंकल ।”

पासा० स्तेलिनं धागू खं थ्व स्पष्ट जुया वल कि “सर्वहारा विश्व क्रान्ति या डबुली गन विश्वब्यापी पूंजीवाद यागु जाल बः मलाई अन न्हापां सर्वहारा क्रान्ति सफल जुया श्रमिक वर्ग यागू सर्वहारा या अधिनायक तन्त्र कायम ज्वी । थ्व उथाय तक कायम ज्वी कि गुथाय तक छगू धुंका मेगू देशे हानं निगू धुंका

धुंका स्वेगुली विश्वव्यापी पूंजीवाद या जाल स्यस्यं मवनी हानं
 अन्त स प्रत्येक देशे पूंजीवाद यात ध्वंस याना सर्वहारा या अधि
 नायक तन्त्र कठहर्न लोप जुया वनी अले उकियागु अनुरूप या
 परिस्थिति ले समाजवाद (Socialism) यागू अन्तिम बिजय या
 पूर्ण सफलता प्राप्त जुया वै अन्त स साम्यवाद (Communism)
 यागु खिप या गट्टी च्युं वनेत मानव-समाज तैयार जुया वै ।

इन्कलाब-जिन्दावाद ।



इन्कलोबी में—

इन्कलाब-जिन्दावाद ! लाल भन्डा बल ,
नेपाल या आर० एस० पी० हूल मुना वल ।

इन्कलाब-जिन्दावाद ! लाहुरे दाई वल ,
हुकूमिया राज सदां यायगु धका धाल ।

इन्कलाब-जिन्दावाद ! काँगरेसी वल ,
प्रजातन्त्र राज सदां यायगु धक धाल ।

इन्कलाब-जिन्दावाद ! कम्युनिष्ट वल
न्यू डेमोक्रेसी यागु राज याके धाल ।

इन्कलाब-जिन्दावाद ! क्रान्तिकारी वल ,
वर्गहीन समाज हे देके धका धाल ।

क्रान्तिकारी-मे

भालरे थन क्रान्तिकारी, देश भोगु भिके त,
लायथुवा व बुँथुवात, मार दको क्षेदनम् ।

ह्याउंगु ऊन ध्वाँ या दथ्वी, ईचा-मुग चिन्ह तथा,
नो या चोकाय् ध्वाँपेना व, भालरे अति सुन्दरम्

देश भिके खातिरे, थःगु ज्यू व धन पाना,
साम्यवादी विकुल पुया, ज्यापु व ज्यामि थं वलम्

तःमि धाको दको स्याना, फोगिं-फिगीं सो वल
वर्गहिन समाज या, स्थापना छिं या वलम्

लाल क्रान्ति साधनं पूंजीवाद ध्वंस याना
ज्याम्व ज्यामि या राज छिनं याय्गु धका संवलम्


लाल रूस, लाल चीन, लाल हिन्द, लाल् नेपा
लाल क्रान्तिकारी यात, “लाल-नेपा” या सलाम्

—लाल नेपा

“समाजवादी क्रान्ति” यागु आन्दोलन या छु' नारातः—

इनक्लाब	—	जिन्दावाद
क्रान्तिकारी जन मोर्चा	—	जिन्दावाद
क्रान्तिकारी पार्टी	—	जिन्दावाद
साम्राज्यवाद	—	मूर्दावाद
सामंतवाद	—	मूर्दावाद
पूंजीवाद	—	मूर्दावाद
सामंतशाही	—	नाश याय्
बुर्जुआशाही	—	नाश याय्
नौकरशाही	—	नाश याय्
ज्यापु व ज्यामिया	—	राज याय्
न्हूगु दुनियाँ	—	बसें याय्
भीगु साधन	—	लाल क्रान्ति
संसार या ज्यामित	—	झपं जु

प्राप्ति स्थान—



नवीन साहित्य भवन

लगन टोल, कान्तिपुर, नेपाल

श्री गोपाल प्रेस, मुजफ्फरपुर ।